

TEKS UCAPAN
YBHG. DATO' SRI ZOHARI BIN HAJI AKOB
KETUA SETIAUSAHA KEMENTERIAN KERJA RAYA
SEMPENA
MAJLIS TAKLIMAT JITU KEPADA PEGAWAI-
PEGAWAI KANAN KEMENTERIAN KERJA RAYA
25 MAC 2016
(JUMAAT)

BILIK MESYUARAT TANJUNG
KOMPLEKS KERJA RAYA

Terima kasih saudara Pengacara Majlis.

YBhg. Dato' Sri Haji Mustafar Haji Ali
Timbalan Ketua Pesuruhjaya (Pencegahan)
Suruhanjaya Pencegahan Rasuah Malaysia

YBhg. Datuk Ir. Haji Adanan bin Mohamed Hussain
Ketua Pengarah Kerja Raya
Jabatan Kerja Raya Malaysia (JKR)

YBhg. Dato' Ir. Hj. Ismail bin Md. Salleh
Ketua Pengarah
Lembaga Lebuhraya Malaysia (LLM)

YBhg. Dato' Ir. Ahmad Asri bin Abdul Hamid
Ketua Eksekutif
Lembaga Pembangunan Industri Pembinaan Malaysia (CIDB)

YBhg. Datuk Haji Sarani bin Dollah
Timbalan Ketua Setiausaha (Pengurusan)

YBhg. Dato' Abdul Razak bin Jaafar
Timbalan Ketua Setiausaha (Dasar dan Pembangunan)

Pegawai-Pegawai Kanan Kementerian dan Agensi, dan seterusnya YBhg. Dato'-
Dato', Datin-Datin, Tuan-tuan dan Puan-puan yang dihormati sekalian.

Assalamualaikum Warahmatullahi Wabarakatuh, Salam sejahtera dan Salam Satu Malaysia,

1. Terlebih dahulu saya memanjatkan rasa syukur kerana dengan limpah dan kurnia-Nya dapat kita bersama-sama berhimpun pada pagi ini dalam semangat dan iltizam yang tinggi sempena penganjuran majlis perkongsian ilmu ini. Sebelum itu, secara peribadi saya mengalu-alukan dan mengucapkan Selamat Datang dan terima kasih kepada YBhg. Dato' Sri Haji Mustafar bin Haji Ali, Timbalan Ketua Pesuruhjaya (Pencegahan), Suruhanjaya Pencegahan Rasuah Malaysia (SPRM) kerana sudi meluangkan masa untuk bersama-sama dengan Warga Kementerian Kerja Raya dan agensi bagi menyampaikan sesi taklimat kepada kita semua pada pagi ini. Rasanya masih belum terlambat juga, untuk saya ucapkan Selamat Datang dan 'Selamat Bertugas' di Kementerian Kerja Raya kepada Encik Mohd Fuad Bee Bin Haji Basrah Bee yang baru melapor diri untuk bertugas sebagai Pengarah Unit Integriti KKR baru-baru ini.

Hadirin yang dihormati sekalian,

2. Perkhidmatan Awam sentiasa berdepan dengan realiti semasa di mana teras perkhidmatan awam adalah untuk menyampaikan perkhidmatan yang mempunyai nilai tambah (value add) kepada rakyat. Kerajaan kini terus komited membentuk perkhidmatan awam yang berprestasi tinggi dan berinovasi kerana rakyat semakin peka, berpendidikan tinggi dan mempunyai espektasi yang tinggi terhadap sistem perkhidmatan awam. Sistem tadbir urus sektor awam yang baik dan budaya kerja berkualiti merupakan landasan utama dalam meningkatkan keyakinan rakyat terhadap keupayaan Kerajaan melaksanakan dasar yang dimandatkan.

3. Begitu dengan konteks kemajuan sesebuah negara, ianya bukan sahaja dinilai daripada aspek pengukuhan ekonomi tetapi merangkumi aspek ketelusan dan INTEGRITI yang dimiliki oleh institusi-institusi negara tersebut termasuklah institusi sektor awam. Mengungkap kata-kata Warren Buffet, tokoh pelaburan tersohor dunia, ***“in looking for people to hire, you look for three qualities: integrity, intelligence and energy. And if they don't have the first, the other two will kill you”***.

4. Sehubungan itu, pihak Kementerian sentiasa mengambil langkah pro-aktif untuk memantapkan integriti bagi memastikan penjawat awam menjunjung dan menegakkan prinsip integriti serta akauntabiliti ke arah mencapai sistem penyampaian perkhidmatan awam yang lebih telus, cemerlang dan berdaya saing tinggi.

Hadirin yang dihormati sekalian,

5. Selaras dengan matlamat tersebut, Unit integriti, Kementerian Kerja Raya Malaysia telah ditubuhkan pada Mac 2014 berdasarkan Pekeliling Perkhidmatan Bilangan 6 tahun 2013. Fokus utama Unit Integriti adalah:

- Menzahirkan hasrat kerajaan bagi memantapkan integriti penjawat awam dengan pengamalan tadbir urus yang baik; dan
- Membina kompetensi, meningkatkan keberkesanan sistem penyampaian perkhidmatan dan produktiviti warga kerja khususnya di Kementerian dan Jabatan serta Agensi-agensi dibawahnya.

6. Kerajaan melalui Mesyuarat Jemaah Menteri telah memutuskan supaya usaha pemantapan keutuhan sistem pengurusan pentadbiran Kerajaan terus dipertingkatkan melalui penubuhan Jawatankuasa Integriti dan Tadbir Urus (JITU) bagi menggantikan Jawatankuasa Keutuhan Tadbir Urus (JKTU). JITU ditubuhkan melalui Arahan YAB Perdana Menteri No. 1 Tahun 2009.

7. JITU merupakan platform untuk mengendalikan isu-isu berkaitan integriti melalui sistem dan prosedur. Oleh itu, pelaksanaan JITU lebih fokus kepada kaedah pencegahan berbanding penguatkuasaan. Saya telah difahamkan bahawa objektif JITU ini merangkumi tiga (3) perkara utama seperti berikut :

- (i) Pertama, Mesyuarat JITU merupakan pemacu perubahan dalam mewujudkan sistem penyampaian perkhidmatan awam yang berteraskan integriti dan tadbir urus baik;

- (ii) Kedua, Mesyuarat JITU menyediakan platform kepada pihak kementerian untuk berkongsi pengetahuan serta pendapat mengenai sesuatu isu dan seterusnya mencadangkan penambahbaikan atau penyelesaiannya; dan
- (iii) Ketiga, mesyuarat JITU ini juga merupakan forum bagi kementerian untuk membentangkan amalan terbaik (*best practices*) yang dipraktikkan dalam organisasi.

Hadirin yang dihormati sekalian,

6. Pada hemat saya, Ketua-ketua Jabatan dan Agensi haruslah sentiasa peka dan prihatin dengan isu-isu yang dibangkitkan di dalam Laporan Audit serta mengambil iktibar dan mempelajari daripada pengalaman-pengalaman kurang baik yang didedahkan oleh Jabatan Audit Negara. Hasil pemerhatian Unit Integriti mendapati banyak kes yang dibangkitkan berkait rapat dengan kesalahan yang berulang.

7. Mengikut statistik kes sehingga Februari 2016, sebanyak 119 kes tatatertib di Kementerian Kerja Raya yang masih dalam tindakan. Sebanyak **97 kes ataupun 81.5%** daripada jumlah kes tatatertib adalah kes pelanggaran tatakelakuan termasuk kes di bawah SPRM dan Laporan Ketua Audit Negara (LKAN).

8. Mengambil kira perubahan persekitaran kerja yang kompleks pada masa kini, terutamanya perkembangan media baharu telah menjadi cabaran baharu kepada proses penyampaian kerajaan. Integriti secara holistiknya bukan hanya merangkumi rasuah semata-mata, atau keluar makan minum atau membeli belah di waktu bekerja, malah ianya merangkumi keseluruhan aspek dalam perkhidmatan awam termasuklah penyebaran maklumat sulit jabatan atau kementerian melalui laman media sosial. Tanpa disedari ada segelintir pegawai gemar muatnaik gambar bermesyuarat, agenda mesyuarat atau pun minit mesyuarat atau maklumat-maklumat rahsia kerajaan. Tindakan ini secara tidak langsung membocorkan maklumat rahsia kerajaan yang membawa kepada persepsi dan impak yang negatif.

Maka dengan itulah pihak MAMPU telah mengeluarkan Surat Arahan Penggunaan Media Jaringan Sosial di Sektor Awam pada 19 November 2009 dan seterusnya Jabatan Perdana Menteri melalui rujukan bertarikh 23 Februari 2015 yang bertajuk **TINDAKAN KE ATAS PENJAWAT AWAM YANG MEMBOCORKAN DOKUMEN MAKLUMAT TERPERINGKAT KERAJAAN.**

Hadirin yang dihormati sekalian,

9. Dengan adanya sesi taklimat sebegini, saya berharap agar Warga KKR dan agensi, khususnya YBhg. Dato'-Dato', Datin-Datin, Tuan-tuan dan Puan-puan yang hadir pada pagi ini dapat sama-sama menyumbang idea dan mengambil iktibar dalam kesinambungan bagi terus berkhidmat untuk rakyat.

Sekian, Wabillahitaufik walhidayah wassalamualaikum warahmatullahi wabarakatuh.

Terima kasih.